

二十四史九通政典類要合編

皇朝

第五冊

新到
和齋
PDG

二十四史九通政典類要合編卷二百九十八

皇朝六

食貨 市糴

周禮司市之法以泉府同貨而斂賒原以爲酌盈劑虛之制後之言事者遂置平準立均輸藉口於泉府之法則失周制之遺矣我國家以時久厥庠民凡陳肆辨物皆因商民所便時地所宜未嘗設立專官而通工易事經邦柔遠之規無不裁成盡善自世祖章皇帝奄有九宇盡革明季召買諸弊禁王府商人滿洲王公大臣家丁莊頭不得出外貿易其供億內府之需靡不當官平市厚給價值並嚴飭內外臣工毋得攤買剋扣收量有式糜費有禁市價有經至於牙行侵蝕居奇既飭之以明條尤曉之以德意以故泉貨溢於寰中刀布流於域外至於市舶之制我國家受命之初高麗琉球率先表貢他如紅毛日本暹羅呂宋噶喇吧諸國遠隔重洋莫不獻琛納寶願效悃忱列聖撫綏懷柔德威並著緣其職貢以通其貨賄寬減稅額以豐其生息厚加賚賞以獎其忠誠又爲之核驗官符譏察內匪是以外藩莫不懷畏百餘年來遐邇皆梯航恐後若乃西北茶馬之市行之既久邊氓番族胥享其利過者新疆底定版章式廓二萬餘里因而度地開墾因中置市先之以官辦次之以招商斗斛權衡一稟部頒法制皇哉大一統之闡規蔑以加茲編次仰見我國家阜成兆民有互市交通之便而無商賈權并之術焉

通典

順治元年定貿易人參例論戶部比因東來之人借黨人參名色擾害地方特行嚴察究治但小民恃貿易爲生未便禁止惟當設立科條使之遵守以後人參止許於南京揚州濟甯臨清四處開肆貿易一應滿漢人民或商或買各聽其便儲市易不平致行搶奪以及虧值勒買等項地方官卽執送京師治罪

通考

二年令各莊頭採買芻糧毋得勒價強買又申江甯蘇杭各處機房組織惡薄之禁四年罷粵東雷廉二郡採珠役五年禁止諸王府商人及旗下官員家人外省貿易六年申定貿易人參人科條嗣後止許在京均平市易永爲定例

康熙九年議定部駁核減銀兩出自民間辦買者概行給還戶科給事中姚文然言各省辦買豆米草料等項俱當官發價其藥材銅鐵絹布絲綿白蔴魚膠顏料等項俱係民間辦買交官價係官發則部駁核減銀兩自應追還貯庫若出自民間駁減之後仍追銀貯庫實爲重困請嗣後將減價銀兩概行給還下部議行

以上通典

十四年禁里攤之弊戶部議湖廣道御史郝浴奏言招買軍需名爲市易實係里攤比及發價或貪官層扣或蠹吏互侵未必盡得實價嗣後軍需糧料如小民情願抵納正賦者卽行給與印票備有里攤情弊該督撫據實指名題叅嚴行處分應如所請從之十七年禁止滿大臣霸占行市木場時內大臣伯索尼遵諭上言聞各省商民捆載至京者滿洲大臣家人出城迎截短價強買如此

則商人必畏縮而不敢前甚非盛世所宜有也邊外之木皆係商人僱民挽伐水運解部除照額抽稅外其餘悉令發賣實欲利及商人今聞諸大臣將採木地方私行霸占以致商不聊生並請嚴行禁止從之

通考

十八年嚴備辦軍前草束米豆等項營私射利浮冒開銷之禁違者照貪婪例治罪又定凡包衣下人王貝勒貝子公大臣家人領贓私占關津生理及王大臣以下各官將銀借貸與民指名貿易者分別治罪有差十九年遣侍郎伊昌阿會同廣東巡撫清釐從前藩下侵占市廛歸民貿易其藩下私市私稅銀兩令充國賦以濟軍需二十二年令戶部給發執照聽渾河運木至天津貿易二十四年以光祿寺估計物價頭緒繁多令凡應買各物俱照時價估計定爲條款嗣又以核減太多恐累

商戶 諭大學士等再行斟酌隨時估計

通志

三十二年停減各省解送物料戶部遵 旨上言各省解送物料共九十九項京中無貨買之物應令照舊解送外查所解印書紙張庫內現有存貯白銅無應用之處應停其解送青粉等三十八項價值并腳價合算比在京師較貴應停其外解照時價在京採買應用或遇時價騰貴辦買不得者具題行令出產處解送從之 四十三年敕部造鐵斛升斗頒發直省先是 上諭大學士九卿等

曰各省民間所用斗斛大小各別此皆牙儉平價之人牟利所致又升斗面寬底窄若少尖量卽致浮多稍平量卽致虧少弊端易生職此之故嗣後直隸各省斗斛大小應作何畫一其升斗式樣可

否底面一律平準至盛京金石金斗關東斗亦應否一併書一爾等議奏於本年五月大學士九卿
議查順治五年戶部將供用庫舊存紅斛與通州鐵斛較紅斛大鐵斛小將紅斛減改永爲斛式順
治十二年鑄造鐵斛二十具一存戶部一貯倉場直隸各省皆發一具今應令工部照部中鐵斛鑄
造七具分發 盛京順天府五城外其升斗俱改底面一律平準各造三十具分發直隸各省永遠
遵行 盛京金石金斗關東斗皆停其使用從之至是復 諭大學士及戶部尚書等曰戶部呈樣
之斛與升斗朕俱注水詳加測量其樣升上下四角寬窄不均算積數見方得三萬一千三百八十
二分有零其樣斗上下四角寬窄亦不均算積數見方得三十一萬六千七百六十四分有零其樣
鐵斛算積數見方得一百六十萬分其數不相符合性理大全嘉量篇第十二內每斛積一百六十
二萬分與今之鐵斛較多二萬分因鐵斛用之已久不可輕改是以依今之鐵斛五斗爲準造新樣
斗一具方徑八寸深五寸積數見方得三十二萬分又造新樣升一具方徑四寸深二寸積數見方
得三萬二千分若依此樣十升一斗五斗一斛毫釐不差 諭畢因出新樣銅斗升付戶部堂官等
令照式以鐵爲之 謹按帝王均平天下治莫先於律度量衡王制若合符節而所謂同之正之者
其法不傳我 聖祖仁皇帝天縱生知特取部造斗斛 親加測量酌古準今垂爲定式於是五量
用嘉允臻其極矣

通考

雍正十一年諭直省督撫飭令各藩司將各省牙帖因地制宜著爲定額報部存案不許有司任意

增添致姦牙恃爲護符把持爭奪抽分利息令商民交受其累嗣後祇將各牙退帖頂補處查明換給新帖再有新開集場應設牙行者酌定名數給發亦報部存案時河南地方出產焰硝之處小販經紀往往以雜物零星易換赴鄰省售賣是年令該督撫飭令各屬實力查禁又以淮關上下凡河路豆米貨船有重載至關口須用小船起剝者土棍輒恃強代雇勒索而河工官員亦每於裝運工料差役封船胥役借端騷擾及三汛搶工則稱裝運緊急物料甚至將重載客船勒令中途起貨者

飭令嚴行禁止

通典

十三年禁各省採辦貢物價短累民之弊 諭旨自古地方官員有進獻方物之禮蓋以將其誠意而爲君者鑑其意而酌納所以爲堂簾之誼聯上下之情也朕卽位以來亦循照舊例間有進獻珍寶古玩者朕概降旨停止鎮臣中亦有隨督撫進獻者朕皆諭止之至於所獻之物備隨時賞賜內外臣工以示家人一體之意並非朕所需用而收貯內府也雖臣之效忠於上君之加恩於下不在乎此然亦儀文禮節之一端所以歷來未廢凡爲督撫者旣以此將其誠悃則當厚其價值俾官民歡欣從事方爲事君盡禮之實心乃朕向聞有特上司體勢發價減少者以致民間視爲畏途如榆次不敢種好瓜肅甯畏植好桃外間傳爲話柄近聞福建採買甘果有短價累地方官之處則與君臣聯接之本懷大相違背朕豈肯爲此無益之儀文而令承辦之微員貿易之百姓或受擾累哉以貢物而累及閭閻萬萬不可卽或交與屬員代辦而令其暗中賠補是又假公濟私收受賄賂之巧

術也似此食用微物朕發價市買何所不得豈肯絲毫累及地方可通行曉諭自接奉此旨爲始著將從前貢物之數再減一半倘仍蹈舊轍朕必將各省貢獻之例全行停止通考

乾隆元年諭順天府五城通行曉諭商人毋許增長物價巧取兵丁營運銀兩二年申明商人居奇勒價之禁三年定直隸宣化府屬採辦每歲需用楊木長柴令出產之懷來縣承辦以專責成其辦解之資仍按數動用正項造入地丁冊內報銷先是安慶按察使張坦麟言牙行侵吞客商銀兩雖值農忙亦准告理追給奉 旨發與各省督撫閱看回奏尋議應如所奏但牙行領帖時應令地方官查明取具保鄰甘給不得濫行給發從之通典

四年以直省牙行歲增 詔令各督撫嚴加核實於是定牙行之例凡鋪戶拖欠商本追繳本牙行帖勒令鋪戶清完其不足之項牙行賠補如牙行侵蝕者並責且保牙行攤賠舊例仍充經紀取同牙行互保一人出具殷實良民互結至於以後客之貨拋補前客之欠移弱客之貨代償強客之欠准且保先行舉首免其治罪

容隱者責令分賠其牙行內同事人侵吞客本均律以牙行侵吞之例尋又奉 旨外省衙門書役多有更名捏姓兼充牙行交部定例治罪地方官失察徇縱亦均論罪通志

五年定各省開報物料價值之例先是奉 諭旨據工部奏稱直隸山東甘肅等省開報城磚石灰等項價值較原定之價或少一倍或少數倍前後多寡甚覺懸殊請將原定價值浮多欸項行文各省督撫確查本處實價一一更正凡類此等欸項一併查改報部等語朕思今日開銷之價值既大

減於前則從前所報之價顯係浮開工部何以不行指參而但請行查改正夫前此所開之價既不足憑則此番改正之價又豈可以爲據乎假有狡猾之人以開價少者爲錯誤多者爲實數該部又何以辨其虛實耶總之百貨價值原屬隨時增減各省不同一省之中各郡縣亦不盡一今預定數目承遠一例遵行則價賤之年必有餘貨以飽官吏之私橐弊在侵漁錢糧爲害尙小若價貴之年採辦不敷勢必科派閭閻弊在苦累百姓爲害甚大惟在各省督撫留心訪查詳確綜覈既不使承辦之官員恣意浮冒虛糜國帑又不至苛刻從事過於減少貽累官民庶爲公平之道又豈預立成式所能杜絕弊端乎其應如何酌量定例之處著大學士九卿會議具奏尋議雍正八年因各題銷事件未有一定成規止憑頂案銷算頂案不能畫一胥吏得以上下其手經工部奏請行令該督撫等將修造工程緩急物料貴賤悉心查訪市價題明定議嗣據各該督撫等陸續造冊具題經九卿會議題准頒行并聲明嗣後時價偶有低昂必應增減者於奏銷案內據實聲明在案臣等請將各省所造冊籍仍存工部以備參考嗣後凡一應修造工程不必拘泥定價所需物料令承辦各員悉照時價確估造報工竣之日另委員查勘取具並無捏飾印結詳報該督撫等詳細核明據實題咨到日工部再行核銷倘承辦各員浮開捏報該督撫卽照冒銷錢糧例指參如所委員查驗不實亦卽以扶同徇隱例參處至京城物料以及顏料等項價值定例有年復以雍正十二年經工部會同內務府確訪時價酌中更定似無過寬過刻之處卽時價倘有低昂亦令承辦之員據實聲明工部

就近查訪酌量辦理從之 二十八年酌定順天府屬牙行事例向例在京各項經紀一牙一帖統計額缺八百九十一名例由順天府通判管理遇有事故懸缺報明府尹衙門募補復定爲五年編審一次將各牙實在情形查明報部至是戶部侍郎管府尹事錢汝誠言上年歲底正屆編審之期據通判呈稱各牙定額多寡不一現在綢緞桐油棉花藥材等行帖多貨少懸缺六十四名乏人充補白炭江米豬肉酒石灰銅鉛錫等行帖少貨多分派城市不敷評價此細彼盈難於酌劑總緣各行地處 京畿商賈輻輳貨物消長未能一定伏思官設牙行原令其平較市價以杜商民爭執之端今綢緞等行經紀貨少帖多懸缺乏人充補而白炭等行經紀又以貨多帖少一人司平數市不獨難以兼顧亦易恣其居奇且恐奸棍私牙從中影射各經紀每以貨積難售紛紛呈報情願領帖承充又以格於定額不敢加增是以臨時每致有估值之爭過後復徒滋負欠之控似應隨時體察量爲變通請將現在懸帖六十四張發司查銷所遺懸額卽於貨多帖少之行准其認補飭司給帖總不得逾原定牙帖八百九十一名之額仍將陸續募補之行次隨時造冊報部查核并請嗣後屆編審之期遇有應行變通者因時酌量通融辦理部議應如所請從之

通考以
上市易

宋以前互市之制其詳靡得而記自宋開寶後始置市舶司權場博易場沿革詳略具載馬端臨考至前明末代抽稅過重防奸則疏以致大啟海氛公行抄劫吳越瀕海州郡數被其害我 國家威德遠播四裔咸賓受 命之初高麗琉球率先表貢暨平臺灣島夷失其故巢懸命中國 聖祖皇

帝因包荒而撫有之歸化浸眾東南舟楫之區商漁樂業鯨波不驚沙鳥雲帆目極無際各島如呂宋噶喇吧日本紅毛紅毛之種數十向所謂出沒煙濤莫知其踪跡者皆已按圖可指就中佛朗西荷蘭暹羅等國橋首面內不憚越數十更以來其他小弱附景希光者又不在此數於是緣其職貢以通其貨賄立之期會以均其勢逸寬減稅額以豐其生息厚加賞賚以作其忠誠而又核驗官符譏禁內匪弛張互用畏慕滋深此今日市舶之所以盛也若乃西北茶馬之市行之已久強無凌弱眾無暴寡邊氓番族胥享其利蓋百餘年於此矣皇上綏懷萬方廟謨大審精弊偏於實中泉布流於域外大宛善馬弗求自徠于闐夏玉不脛而走初非與爲市而得之者近則准哈薩克之請開烏嚕木齊之市先之以官辦次之以招商時地交宜遠邇利賴繼自今毓浮索引四瀛相望大一統之闡規至是蔑以加矣

順治二年設張家口古北口章京時命哈薩克哈駐張家口滿都布資駐古北口論之曰爾等駐防之地凡外藩各蒙古來貿易者俱令駐於邊口照常貿易毋得阻抑其喀爾喀部落來市馬者令

駐於口外申報戶部又定陝西以茶易馬之例

以上通考

十一年准暹羅貢使所攜貨物願至京師貿易者聽其自運其願在廣東貿易者督撫委官監視十

通志

三年准荷蘭國及吐魯番貢使在館交易十八年又准達賴喇嘛及根都台吉於北勝州互市康熙二年停止朝鮮國王開送貨物印文凡外藩貨物有該國王印文開送者准其貿易朝鮮陪臣

下人應山等帶貂皮一百張印文內並未開載經禮部奏聞得旨免其議罪交易貨物聽其隨便

攜帶至日報部於會同館交易該王印文著停止應禁之物回時令邊關官員詳細嚴察

通考

二十二年令厄魯特噶爾丹博碩克圖來使酌量數入進關其餘聽在張家口歸化城等處交易事

畢隨卽遣回時阿達哈哈番瑪拉等以茶布往征羅刹軍前市易上諭茶布不必攜往可於戶庫

支銀四千兩量買諸物馳驛抵該地換取牛羊糧米以備軍需二十八年暫開甯夏等處互市先是

領侍衛大臣索額圖等與俄羅斯來使議定分界事宜至是遣官立碑於界凡一切行旅有來往文

票者許其貿易不禁自是遣使通貢互市不絕三十二年以日本洋銅饒裕令安徽江蘇浙江江

西等省各商攜帶綢緞絲斤糖藥往彼處市銅分解各省每歲額市四百四十三萬餘斤

通志

三十六年准鄂爾多斯於定邊花馬池平羅城貿易鄂爾多斯貝勒松阿喇布言向准臣等於橫城

貿易今乞於定邊花馬池平羅城三處令諸蒙古就近貿易上命大學士戶部兵部及理藩院會

同議奏尋議應俱如所請令貝勒松阿喇布等及地方官各自約束其人勿致爭鬪從之又准朝

鮮國於中江地方貿易米穀朝鮮國王李焞言請於中江地方貿易米糧奉諭旨朕撫馭天下內

外視同一體朝鮮國王世守東藩盡職奉貢克效敬慎今聞連歲荒歉百姓艱食朕心深爲憫惻今

盛京積貯甚多著照該國王所請於中江地方令其貿易是月遣戶部侍郎貝和諾往奉天督理朝

鮮糧米事務尋戶部遵旨議言奉天米石運至中江貿易應令殷實誠信之人取具地方官印結

前赴奉天領米輓運照時價交盛京戶部所賣米不許過倉石二萬石其朝鮮進貢來使有買穀帶
去者聽又鹽商張行等呈請情願前往朝鮮貿易應令將銀買倉米二萬石運往俟朝鮮歲稔時停
止此時運往米石令伊國將所產之物酌量兌換從之 四十一年遣官偕喇嘛監督打箭爐貿易
喇嘛達木巴色爾濟郎中舒圖員外鐵圖等往打箭爐地方監督貿易 上諭之曰爾等至彼即將
奉差情由移文第巴須文辭明悉令彼速遣大喇嘛來監督貿易倘若遲滯將我等撤回永遠不得
貿易矣其稅銀不取於彼就我國商人征之不可專以稅額爲事若立意取盈商賈不至與禁止何
異此項錢糧不多勿以此注念又 諭達木巴色爾濟曰爾移文第巴其辭須云爾等務遵旨行事
倘若有違不但無益爾等卽我喇嘛亦無益處達木巴色爾濟奏曰倘第巴不將厄爾得尼濟農解
至則臣不令其入貿易濟隆胡士克圖與青海人眾係我 朝之人令其照常貿易 上曰俱令照
常貿易 五十七年議外國夷商聽照常貿易令沿海官不時防衛兵部議覆兩廣總督楊琳疏言
據原任碣石總兵官陳昂條奏臣詳察海上日本暹羅廣東噶喇吧呂宋諸國形勢東海惟日本爲
大其次則琉球西則暹羅爲最東南番族最多如文萊等數十國盡皆小邦惟噶喇吧呂宋最強噶
喇吧爲紅毛市泊之所呂宋爲西洋市泊之所而紅毛一種奸究莫測其中有英圭黎干絲蠟和蘭
西荷蘭大小西洋各國名目雖殊氣類則一惟荷蘭西一族兇狠異常且澳門一種是其同派熟悉
廣省情形請令督撫關差諸臣設法防備或於未入港之先查取其火礮方許進口或另設一所關

東夷人每年輪流貿易不許多船並集查外國夷商利與中國貿易而夷商懽服有素數十年來沿習相安應聽其照常貿易將該總兵所請查取火礮另設一所關束輪流貿易之處無庸議請於夷船一到之時令沿海文武官弁晝夜防衛使其懽服無致失所應如所請從之

雍正三年令青海諸部落移於河州松潘西甯等處隨時貿易議政王大臣等覆准奮威將軍岳鍾琪疏言大將軍年羹堯奏定前例青海與內地之人每年於二八月貿易兩次擇定納喇薩喇地方爲交易之所經議政大臣議改四季交易已覺寬容今查親王察罕丹津公拉扎卜等諸台吉部落居住黃河之東切近河州去松潘亦不甚遠向來原在河州松潘兩處貿易今若令於納喇薩喇二處恐不足供黃河東西兩翼蒙古易賣莫若仍令在河州松潘貿易終覺穩便河州定於土門關附近之雙城堡松潘定於黃勝關之西河口此二處俱有城堡房屋地方寬闊水草俱好利於互市可爲永久再查郡王額爾德尼額爾克托克托肅郡王色布騰扎勒等諸台吉部落住牧黃河西邊相近西甯請將貿易之地移在西甯口外丹噶爾寺至蒙古貿易全藉牲畜每在六月以後請每年不定限期仍聽不時貿易則蒙古商販均獲利益矣從之

以上
通考

乾隆二十二年議定甘省口外哈薩克交易事例先是本年十月將軍兆惠富德等言阿布賚請將馬匹赴烏嚕木齊貿易經大學士等議以烏嚕木齊路程寫遠商販稀少難以聚集且初次辦理未能熟悉夷情莫若官爲經理俟試行一二年後定有章程再行招商承辦至是陝甘總督黃廷桂言

烏嚙木齊距內地爲遠脚費浩繁重於貨本查烏嚙木齊與吐魯番相近此地運貨既便又有屯種官兵彈壓照料不須多派交易之處似應於吐魯番爲妥再明歲交易止換馬匹哈薩克人等遠來所帶如有駱駝牛羊亦係軍營需用請一體收買其應需緞匹內府撥解絲色精良而官辦之後仍須招商恐成色略減現請於陝甘採買各色緞二三千匹已足敷用至茶封則哈密現存茶七萬八千餘封爲數頗多布疋則巴里坤現存自哈密購買之雜色梭布三百對京莊布一千七百匹即可運往選委道員同知各一員并派副將酌帶備弁挑派兵丁一百名押運如有小本經紀願隨前往各聽其便下軍機大臣議尋議准烏嚙木齊距巴里坤雖遠而以哈薩克之至烏嚙木齊計之則又不啻數倍前據阿布資所請業經奉 旨酌定准其在該處貿易似不應又行更易地方以失信於遠人且臣等原議原因烏嚙木齊商販難至是以暫令官辦卽云運費倍於貨本原可按其運費加定價值況哈薩克越在荒服而吐魯番近接邊陲建有城堡屯田較之烏嚙木齊之地方空闊可以隨處開列市集者不同若令貿易夷人往來於吐魯番恐吐魯番回民或有私相交易等事未免轉致滋擾應照原議仍在烏嚙木齊貿易用昭大信至於收換馬匹專爲軍營備用如騙馬之外或有隨帶騾馬亦可酌量准收至駝牛二項哈薩克出產本少或有隨帶羊隻等畜足供軍需者自應一體收買其餘疲瘦牲畜及一切雜貨雖不應准其貿易但念夷人攜帶遠來或量爲減價收留以示節制緞匹一項應如所奏辦理茶封布匹尤係哈薩克人眾必需之物自應卽於現存內酌量運往

餘均應如所奏行惟是明歲係哈薩克夷人初次貿易雖不必過於遷就致使將來援以爲例但一應價值交易之際必宜仰體 皇上柔遠之恩示以公平俾遐荒夷眾咸知 天朝大體畏服感悅方爲妥協應交該督轉飭派往之道協各員善爲經理尋黃廷桂覆奏道員范清洪同知范清曠二人向曾承辦軍需其餘貿易之事自必有熟練可委之人仰請 欽定一員俾之帶領舊時商夥先期來肅臣將交易各事宜與之講論明白屆期前往承辦較之素不曉習經紀之員實屬有益惟是烏嚕木齊相距遙遠如哈薩克貿易人等先期已至而我處貨物未到則遠人有守候之累若我處貨物先到而哈薩克或衍其期亦不免稽延時日致滋糜費並請 敕下將軍兆惠富德曉示哈薩克將明年何日起程約於何時可至烏嚕木齊先行通知咨會到臣以便依期齊至而無守候更爲妥協下軍機大臣議尋議此次貿易各事宜誠非熟諳經紀者不能辦理應如所請將范清洪等於甘肅現任內調補一員令其酌帶熟練人員前往至所請交將軍兆惠曉示該夷先行咨會以便依期齊至等語查哈薩克初次貿易原與從前貿易者不同前既定以貿易之期該夷程途爲遠難以再令行文曉示應令該督一面咨詢將軍兆惠酌量計算程期先行知會一面辦運貨物總在七月初間齊赴該處如果彼此如期齊至固可卽爲交易卽哈薩克因路遠稍遲數日諒亦不致久費守候議入從之嗣於二十三年三月黃廷桂言本年七月內哈薩克在烏嚕木齊交易事宜臣遵照議一切先爲備辦其陝省辦解緞三千匹業將二千匹運赴巴里坤收貯惟巴里坤現存布匹恐爲

數尙少亦經酌量在甘涼肅辦解校布三百對京莊布一千五百匹陸續運往收貯備用茲待銜帑三遵 旨自軍營回京抵肅臣思帑三前在軍營於哈薩克情形最爲熟悉因將交易事宜詳悉詢問據稱哈薩克各部人皆散處凡有調遣會合之事俱各隨所願不能派定將來貿易人數或多或寡難以預定內地茶葉一項非其所好不必備往卽粧蟒緞匹等類遠運來甘脚價繁重雖伊等心愛之物宜酌量配搭不可專用過多致爲成例惟各色姑絨褥子毡片毯子印花布等物夷地所無購運亦易若攙搭換易似爲至便再伊處女人皆以白布纏頭用處最多似宜寬裕備辦等語臣查烏嚕木齊道路遙遠需用之物若臨時備辦卽緩不濟急姑絨褥子毡片係西甯蘭州等處出產臣擬分飭該布政司將此三項各辦二千匹再辦毯子五百條印花布三百對添辦京莊白布一千匹以各屬所車徐徐運送到肅雇車轉運赴巴里坤收貯屆期一併馱運前往以備交易從之 二十七年准英咭喇夷商配買絲劬奉 諭旨蘇昌等奏英咭喇夷商咄囑等以絲劬禁止出洋夷貨艱於成造籲懇代奏酌量准其配買情詞迫切一摺前因出洋絲劬過多內地市值翔踴是以申明限制俾裕官民織紉然自禁止出洋以來並未見絲劬價平亦猶朕施恩特免米豆稅而米豆仍然價踴也此蓋由於生齒日繁物價不得不貴有司恪守成規不敢通融調劑致遠夷生計無資亦堪軫念著照該督等所請循照東洋辦銅商船搭配紬緞之例每船准其配買土絲五千觔二疊湖絲三千觔以示加惠外洋至意其頭疊湖絲及紬綾緞匹仍禁止如舊不得影射取戾

通考

二十九年准兩廣浙閩各商攜帶土絲及二蠶湖絲往柔佛諸國貿易此後外藩貿易悉照常例至於西域藩部來新疆貿易者各有常例如哈薩克諸部於伊犁貿易布噶特諸部於喀什噶爾貿易痕都斯坦諸部於葉爾羌貿易齊齊玉斯諾爾根齊諸部常至伊犁等處貿易又定外藩商人在回部貿易者三十分抽一皮幣二十分抽一回部商人往外藩貿易者二十分抽一皮幣十分抽一其牲畜貨物不及抽分之數視所值低昂以普爾折算

通志以
上互市

輕重之說始於管子管子曰民有餘則輕之故人君斂之以輕民不足則重之故人君散之以重其後李悝得其術以相魏每歲視上中下三熟以爲糴卽視大中小三饑以爲糴而平糴之說詳焉常平義倉和糴者又本於平糴之法也自唐以後積貯非不豐盈至宋又有結糴奇糴倭糴均糴博糴兌糴括糴諸名目原其始意未嘗不欲抑富貴囤積居奇之謀而其既也或取以充他用或取以給邊軍甚至挪移補空官自效商賈之爲而利其積粟之入於救荒全無實濟大失常平之意矣我

國家太和洋溢年穀順成而列聖勤求民瘼多爲未雨綢繆之計其在直省則設有常平倉鄉村則有社倉市鎮則有義倉近邊則有營倉瀕海則有鹽義倉又復以時布截漕之惠定勸輸之法廣協採之方申遏糴之禁其糴糴也有時其出納也有制出陳易新不累害於閭閻散滯取盈嚴漏棄於胥吏

鴻規善政無一夫不沾實澤此所謂萬世不易之良法也

通典

崇德元年上半年命戶部承政英俄爾岱馬福塔傳諭曰米穀所以備食市糴所以流通有糧之家輒自